

إبرة حلم

شعر

نور الجنة درويش

مؤسسة يسطرون للطباعة والنشر والتوزيع



رئيس مجلس الإدارة

عماد سالم

المدير العام

أحمد فؤاد الهادي

مدير الإنتاج

أحمد عبد الحليم

الطبعة الأولى

الكتاب : إبرة حلم

المؤلف : نور الجنة درويش

تصنيف الكتاب : شعر

تصميم وإخراج : أحمد عبد الحليم

المقاس ٢٠ × ١٤

رقم الإيداع : ٤٥٨٧ / ٢٠١٧

الترقيم الدولي : 2 - 375 - 776 - 977 - 978

العنوان : المكتبة والمطبعة : ٣ ش صفوت - محطة المطبعة شارع الملك فيصل - الجيزة

التليفون : ٠١٢٢٩٣٠٠٠٢٩ - ٠١١٥٧٧٦٠٠٥٢

Email : yastoron@gmail.com

موقعنا على الفيس بوك : مؤسسة يسطرون لطباعة وتوزيع الكتب

جميع الحقوق محفوظة للمؤلف

الإهداء

إلى أمي وأبي منبع حياتي ، ونور عيني .

إلى زوجي رفيق الدرب ، وحبیب العمر .

إلى ابني الحبيب أحمد هاني فرحتي وأملي .

إلى شقيقتي الغالية الإعلامية لبنى درويش .

إلى صديقتي الأعلى ، وعمة ابني ريهام .

إلى كل من ساعدني مخلصا ؛ كي أترجم مشاعري
وأعزفها لحنا خالدا على الورق نبضه الكلمات .

إلى كل أقاربي ومعارفي وأصدقائي ، وكل من
يحسنون الظن بي .

أهديكم بعضا مني؛ فترفقوا به .

أحبك ربي

أقسمت بـيك ياربي
لادعى واصلى لك
ورسمت فرحه بقلبي
لاجل ان انا أجيلك
حبك يارب أمان
ف الدنيا والأخره
رضيتنى بكل خير
وحمدت بزياده
خيرك يارب كتير
يارزقنى كالعادة

وحلفت والله لاصوم
وافطر بغفرانك
والعمر فيه كام يوم
وانا اعيشه علشانك
يارب يا حنان
انصرنى من عندك
زيدنى يارب إيمان
قوينى بيك وحدك
ارزقنى يارحمن
اوعدنى بالجنة
اسمك فى كل أدان
يزين المعنى
أصبر فى كل بلاء
حبك يقوينى
اسمك يارب شفاء

نورك دوا عيني
قربت ليك وناجيت
في التوهه والزحه
وبكرمك اتوضيت
والقرب ليك رحمه
اقسمت بيك ياربي
لادعي واصلي لك

نور

نور إنسانه بسيطة عادية
بس طبيعتها زايد شويه
لاهي كدابه ولا حشريه
عايشه حياتها زي ماهي
كل خبيتها والي كابتها
إنها ماشيه بحسن النيه
أصل إيمانها هو إمامها
ربنا وحده اللي مُعلمها
اللي يشوفها
يظن بسرعة

إنها طالعة
وعايشه شويه
نور بتحب الناس وبجد
والثقه فيهم ماهاش حد
حتي الناس اللى بتعرفهم
وف وقت الشدة
كثير بتشوفهم
بيقولوا عنها لقمه طريه
تغرق يعنى فى شربة ميه
بس ياعم إنت وهىَّ
حيلكم حيلكم
خَفَّوا شويه

دانا لا بجامل

ولاراح أمثل

علشان يعنى

مهما تكونوا

مش هتأثر

بس ويعنى ليه هاهتم

ماهو فى الدنيا أشكال غم

الى بيرسم واللى يحور

واللى ع الحلويين بيدور

واللى عيوننه ما بتتلم

والطيب أوى وخفيف الدم

واللى يحب يشوفنى سعيده

ویشیل عنی کل الهم
وحبة ناس فاكرینها شطاره
وتفضل تفتی وتعمل غاره
بس یاریت یلبسوا نضاره
لا دی جمیله بس شقیه
وزیادة حلاوتها شویه
واللی تقولك لا مش عینها
دی العدسات شایفاها عنی
وغریب طبع البنی أدمین
وکیمان انت تطلعی مین
علشان یعنی تفصصی فی
کل جمالی جمال ربانی

لاصناعه صيني ولا تيوانى
ومش بهتم بناس بتعانى
م الأمراض المستعصيه
بس كفايه وخفوا شويه
هادعى لربى إنه يعينكم
على أنفسكم
على ضمائركم
وان قلوبكم تبقى نقيه
نور إنسانه
بسيطه عاديه

إبرة حلم

ويُكْرُ الخيط حكايتنا
ونقول للعمر فين هيَّ
فيبدّل صدق لمتنا
غريب الطبع والنيّة
نلاقي ألامنا تسبقنا
تخلّي الدنيا مش هيَّ
ف نلضم حلم أيامنا
بإبرة خيط مصديّة
فتتسمم قلوبنا أكثر
بخيبة كبيرة وقوية

فتدوس ع اللي يتأثر
بدمعة عين مندّية
يضيع متقومش ليه قومه
وخلق غريبة مؤذية
عابد مكسبش من صومه
غير لقمة هم منفيه
منفية بره حسابتنا
والي صحينا فيه بيتنا
فصّلت الحزن بإيدي
ولما شوفته كان أكبر
م اللي قسته أنا عليّ

آخر قرف

متغربه كل الدروب

م اللي انحرف

فين الكرامه والحيا

فين الشرف

آخر قرف

حال الطريق

ماييل ريق

ليلى اعترف

إن اللي خانوا

جوه عتمة الضلام

كانوا غيوم
سهرانه تحرس
في سماك بالخداع
كانوا مرار الحلق
يشهق من ضياك
كانوا الوجع
وقت الفراق
والى استمع للوهم فاق
مسجونه صرخة قلبنا
ونعيش ونحلف كلنا

إن اللى ماتوا مننا
كانوا الحياه
كل الحياه
لبراءه تاهت مننا
ماتفكر وش إن اللى خان
راح ينتصر
عمره فى يوم
مايكون ميزان
راح ينكسر
وتضيع معاه كل الحاجات
كل الأموال والذكريات

فأزاي تعشم البشر بالمستحيل

وتقولهم

إن القمر شيء مش جميل

هي الحياه أو هام ندى

ع كذبها متعوده

ومحوّده عن كل دقة حق

الحق هوّ الحق

هوّ الدليل

هتعيش كده متغرّبه

اسمع معاليك

عينك مبعثش بتو حشنى
ولا هسأل فيك
وقر نظراتك لعنيها
يمكن ترضيك
ماهو عادى أكمل
إيه يعنى
من غير معاليك
حبك كان وهم وحسيته
ورضيت بالهم وحبته
ضيعنى معاه لما هو يته

غضبانه عليك
ملعونه مشاعري القلابه
تعشق وتقولى يا كدابه
عشان بتأمنى لديابه
تخدع وتخون
ولا يوم بتصون
طب قولى ازاي كده حبيتها
ونسيت الدنيا ولا نسيتها
طبعا ده أكيد من حلاوتها
معذورة عنيك لما شافتها

اتطرفت فقدت جودتها
ألف سلامه ويا عيني عليك
هتعيش وياها كما الأعمى
خايف مكسوف
وحياتك تصبح بلا معنى
وتموت م الخوف
لتخونك تانى ما ده العادى
وانت اللى رضيت
هتقولى ازاي ده كلام فاضى

ما انت اللى بديت
إنت اللى بديتها بغشوميه
ورضيت بحكاياه وهميه
وان كان ع الحب أنا مش همى
عشان يرضنى الحب عليك
ركز صحصح فتح ف عنيك
شوف كام واحد حَبْتُهُ وزَّاي
عشقتُ عشاناه الحريه..
افهم معاليك

الشاعر ع المنصه

ياجماعه في شاعر ع المنصه
وناس بترغى وناس مش باصه
الى يقولك ياعم سييك
ركز وارغى ويا حبييك
هواحنا يعنى فرض علينا
ولا احنا قاعدين في الحصه
كبر يا ابنى وفكك منه
مين راح يسمع غصبن عنه
دول حرفين هينفوق بيهم

ويقوم ويروح بعديهم
بكره برضه يروّق يصفى
طب بالذمه هاقولك إيه
وانت كمان مستهتر بيه
هو كلامي معاك راح ينفع
وانا لو انصح
معقول راح هتسمع
خدها مني يا ابن الإيه

اتعلم تسمع له يابيه
وبلاش يزعل شاعر زيك
متزودش كمان في القصه
خلي الكل يقرب منك
ركز حبة وافهم حبه
من غير همسه
ومن غير بصّه
دا حق الشاعر
والمنصّة

بيني وبينه

وطبعاً وأنا راجعه كالعاده
من الندوه ومتأخر
وعشان تكمل وبزياده
حبيبى صاحي و مكشر
وزعلى يبقى ليه ساده
وكل كلامى متعسر

.....

قولي لى أعمل إيه فيك
أسيب البيت علشان أعجب
بحبك أيوه كتير وشاريك
لكن غيرتى أكيد راح تغلب

حبيبي نزلت متأخر
ووصلت يادوب مفيش حبه
وكان في ناس وبزياه
طلبت القهوه جت ساده
فضلت استنى
أقول وامشى
ماهو برضه
عيب ماينفعشى
يقولوا هُمَّ إيه عنى
جايه اقول كده واغنى
وناس تسمع ومسمعشى
اكيد طبعا مينفعشى

يارب الكون .. صبرنى
طب اعمل إيه هتخسرنى

.....

شوية عقل من فضلك
بقى التأخير فوق طاقتى
يابنتى بصّى فى عنىّ
أنا راجلك وتاج راسك
أنا سندك وحراسك
فبلاش مزاجى يتعكر
واجيب أخرى
وكل شويه أتعصب
وأصبر وأجى على نفسى
وأقول: إمتى بحالى تحس
وان كان ع الحب وسنينه

عليه هقفل بيان القلب
وبلاش أعصابى تتوتر
وأوجاعي تزيد أكثر
وأملى فيك يتغير
عشان ندوه
طب كنت
شوفيني أنا الأول
بحاجة م الإدين حلوة
وتبقى الغدوة لي غنوة
بدل ماتروحي من بدرى
عشان الوقت دا بتاعنا
وفى لحظه ترجعى تجرى
حبيبي ساحني
دي مسابقه

.....

خلاص خلصت محكمتك
ونسيت إني أنا عزمك
ع الندوة ومارضيتشى
وانا اللى بقول عليك قدوة
وبفخر بيك
خلاص عايزنا نتخاصم
واسيب قلبى كده مختار
ماين حبة غنا وأشعار
وحبيب زود حياتى مرار
ومها يكون أنا بحبه
عشان خايف علي بجد
وانا المتربعه ف قلبه
ونفسي نعلا في العالي
يزيد الود
أتاريه واقف لى ع الوحده

وإيه يعنى أما جيت واحده

دى مره يتيمه معدوده

بلاش الليله تكون سوده

أهون عليك انا يعنى

أصالحك وانت توجعنى

.....

ياقلبي ماهو إنتِ غيظتيني

خلاص ياستى ساحيني

عشان خاطرى بلاش ندوات

أنا شاهد وبالأثبات

إنك مبدعه وحلوه

وصوتك جاي من الجنة

إن كان فى شعر أو غنوه

هاقولك إيه مانا بحبك

ونفسي اعيش كده جنبك
قولي لي بجد وصراحة
لو إنت مكاني عملي إيه
ولما أحس بالغيرة
أسكت ولا أتكلم

.....

حبيبي إنت كده معلم
وإيه رأيك
بكره عندنا ندوه
ينفع ياقلبي توديني

.....

آه ياغلبى وسنينى.....
طيرتى النوووم من عيني

أمی

ياحضن ملىان بالدفا
كلك حنان قلبك يا أمى
مولوده من رحم الصفا
حبك أمان فى دنيتى
رضاكِ عنى جنتى
ياللى عيونك سكتى
إنّى وجودى وبسمنى
وانا فى حبك مسرفه
سهرتى يا أمى السنين
عشان اعيش

شربت من كفك حين
لسنين سعادة ماتتسيش
ربك يعين
وتبقى جنبى ماتبعديش
ياشمس بتنور حياتنا كلنا
يانجمه عاليه فوق
وجعنا وفرحنا
ربى يصونك ويراضيك
وتعيشى دايمًا مؤمنه

رسائل القلب

علم قلبك يبقى سعيد
وارسم فرحة بشكل جديد
وانسى الهم كأنه بعيد
تلقى براح الكون
بينور كل ما فيك
عيشها كأنها ليلة عيد
ليه تتضايق أو تتعصب
ارمي همومك حاول تضحك
يومها الفرح هيملي عنيك
فرح قلبك وبلاش تغضب

لما تحس إنك زهقان
أو خائف مش لاقى أمان
ولا اشتقت لحاجة زمان
تاھت ملقتھاش حوالیک
علم قلبك النسیان
فكر تاني وعید حساباتك
خلي الذکری تعيش بحیاتك
تلقي الضحكة تنادي عليك
أتعلم تسعد أوقاتك

بلد السلام

ياللي غنيت للسلام
غنويتين
مصر دي بلد الأمان
مش كلمتين
مصر كلمة حق لينا
مصر حضن بيناديننا
مصر هي اللي ف عنينا
باقية لينا ف كل حين
جمعي ولادك يا غالية
ضحكتك دي نجمة عالية

أحضنيهم بالحنان
صبريهم بالإيمان
إنّ فينك من زمان
رجّعي فينا الحنين
ياللي غنيت للسلام
غنويتين
مصر دي بلد الأمان
مش كلمتين
صعب اعيش واحكي

وأقلب ف اللي فات
حبي ليك ف يوم يابلدي
مش مجرد ذكريات
بس كوني انتِ معانا
وابعدي عنا الخيانة
مستحيل اقبل إهانته
مصر دي أرض الكنانة
باقية لينا ف كل حين

أحمد

أحمد.. يا بني

يا مغلبنى

ياللى تاعبنى

ليل ونهار

حبي ليك

عمرى اهديك

يا قصة حب

ماليها قرار

لو تدلع

برضه شويه

إنت الفرحة
جوه عنِّي
واما تجيني
أو تنادينني
نفضل نلعب
قط وفار
كل الدنيا
ماتسوى
عنك
هافضل
احبك
واجرى

عليك
ما انت القلب
النونو الصافي
وانت الحظن
الغالى الدافى
وانت هدية
ربى الشافى
يحميك ربى
م الأشرار
أحمد .. يا بنى
يامغلبنى

هشاشه روح

ولسه بننشر الأحلام
وحيال الأمل داييه
نشبكها كده بميزان
وكفة عدلنا غاييه
تنشّف حسنا فينا
وتفردنا وتكوينا
على وعود بالأمل خاييه
وبعد غسيل طويل للروح
تعصّر مننا جروحنا
تبدل صدق ملامحنا

فترجع تانى للتووه ونتحدى
فنلقى الصوره مهزوزه وتتقضى
حياه فارغه بلا رحمه
وتاخذ ضحكى سرقه
ورغم التووه والزحمه
هاتمسك بحلم زمان
وازرع م الأمل فدان
وخوفنا نبدله بأمان
فترضى نفوسنا بالحاضر
ومين يهرب من المكتوب
فليه نحكم شيطان غادر
نافش ريشه

وطاير في السما تايه
بيتعاجب كده بجيشه
وآه م الضعف والحسرة
نعيش نحلم بحريه
يمكن تيجي في الآخره
وقلوبنا صابره وقويه
ولسه بننشر الأحلام
وحبال الأمل دايبه

طبع البشر

طبع البشر غلاب
عن حقنا محوّد
يخدع بلا أسباب
ع الظلم متعود
الأوله أحباب
م الصدق بنزود
والآخره فيها عذاب
والمش بيّدود

في الدنيا صعب تعيش
بقلبك الطيب
والفرح ليه ما يجيش
والكل بيعيب
طبع البشر غلاب
ع الكذب متعود

أقصر الشر

أقصر يا قلبي الشر
واقفل عليك بابك
واياك تقول مضطر
وتئنذى أصحابك
غلبان وغلبك زاد
كتر الهموم هدك
وجعك يكفى بلاد
في الجرح مين قدك
مسكينه يا أحلام
ممنوعة كالعادة

الظلم والله حرام
ياخلق بزياده
معذور بلا أعدار
ع الغدر متعود
قايد في قلبى نار
ولا مره هيحود
عن حق لو شافه
وهموم كثير بتزيد
دايما على كتافه
اقصر يا قلبى الشر
واقفل عليك بابك

حالة مرض

صايبه الجميع
واللى اعترض
ممكن يضيع
كل الخطوط متقفله
فى سنين بلاوى
متلتله
عاشينها عقده
فى سلسله
حتى اللى باقى مننا
محكوم عليه بالانتحار

أحلامنا تاهت وسطنا
صبحت مرار
مرار بيهرى فى حلقنا
هتقول لمن
إيه العمل
وعذابنا صبره ولا الجمل
هى الحياه فرضت
علينا نفسها
حتى النجاه بقيت حكاية
وعكسها
كل اللى عدى فى عمرنا
كان بث تجريبى

لحياتنا
ملعون أبوك
يا اللي إنت حابب
ذلنا
وبلاش نقلب فى اللي
فاتنا
واصبر لحكمة ربنا
عمر القدر ما يضلنا
خللى الإيمان بالمستحيل
هو الدليل
أصله الدليل
لسنين حياتنا
وجرحنا

القبلة

لاقيت القبلة
مش قابله
أقف تايه على بابها
وكل حياتي متقابله
بنور الطاعة باعتبارها
وروحى لاقيتها مقبوله
ودايمًا تطلع الأولى
على اصحابها
ترد النفس من جوّه
بيشغلنى رضاه هوّ

ده ليه الحمد وبقوه
عشان قلبي مريحنى
بحب الله بينصحنى
اعيش وياه هو المولى
وخوفى هو بيه أولى
فلاقى السبحه واخدانى
وسايبانى ف عالم تانى
ملان بالذكر ومعانى
تهز فى كل وجدانى
وازيد دايا فى اذكارى

واعطر لیلی ونهاری
وذكر الحب خلانی
أتوه عن نفسی ومکانی
وألقى الروح تقول الله
وتانی تاخذنی سجاده
لذكر وعزه وعباده
هنا سجدت نفوس طاهره
بحب الله كانت ظاهره
فی عز تعبها وبتحمد
ولا بتغل أو تحسد

حياه بالذكر تتحلى
قلوب بالحب تتولى
لقرب الخالق المولى
فتلقى الدنيا دى فانيه
جمال زایل كده ف ثانيه
وحب الله هيبقى لك
فى بركه ورزق لعيالك
وتلقى القبله ليك قابله

بنك الفقر

خلى ذكراك الجميله
ترفض قساوة ذلنا
إحنا اتولدنا
فى يوم وليله
أوجاعنا سرقت حلمنا
متحاسبينش من غير تمن
ميكفينش قرض الزمن
لو تدفعيه وقت الغلا
ليه تقدرى وقوع البلا
قبل الطابور مايعدى

نص المجروحين
ما بلاش غرور
سددت دينك من سنين
وانتِ البعيده كما القضا
جايبه لنا عله مزمنة
ويا الأهات
والفقر مصروف بالشيكات
وعزانا أصبح من سكات
حتى اللى فاضل منا
شوية حاجات
مكتوب عليها البخت مات
ومفيش عزاء إلا أذا

بنك الحياه
فكر وشاور حضرته
للمستحيل إنه يميل
ناحيه بواطن ذمته
يضغط عليه ويثبته
وبدون رصيد
وحساب جديد
وبكل قوه يسكته
فيعود لحضن الذكريات
من غير ضمير يقدر ييات
والملة فارقت ذمته

وصف الشاعر

قالوا الشاعر رص حروف
والكل يشوف
قوت الشاعر يعنى مشاعر
قلبه مايدخلهوش الخوف
قالوا الكلمه دي زى اللوحه
لازم تلمع للزوار
قوت الكلمه هى البسمه
رمز العزه والإصرار
قالولى بكره هتتعلمى

وعن أشعارك تتكلمى
رديت جايز إنى أكون..
إنى لسه فى بداياتى
بس الشعر هو حياتى
فجأه لقيت الشعر ندا لى
جالى وقولت حيبى الغالى
وانا من يومها بديت حكاياتى
قالوا مغروره وعائشه الدور
قولت وماله برضه هقول
إن كلامكم غير حساباتى

إن الكل شايفنى غريبه
وان حروفى عجيبه كئيبه
مالكم بيّ دى والله مصيبه
إزاي تتكلموا عن ذاتى
جوّه الشعر ياناس إحساس
عامل زى فصوص الماس
حاجه تشوفها ماتلمسهاش
تفضل تعلق وتكبر فيك
تجمع كل الناس حواليك
ناس القلب ماينكرهاش

حاسین فعلا بالكلمات
جوه عیونهم تحكى ساعات
یکبر قلمك و یعلیک
ولا هیهمك أی ظروف
طول مابتغزل أحلی حروف
وتیجی تقویّ و مش مکسوف
إن الشاعر رض حروف

كذبه

ومن كذبه لكذبه أكبر
بهم القلب نستهرت
م اللي ضاع مش أكثر
وقسوه فوق ماتتصور
أمال بتضيع ونتحسر
في دنيا الغدر والقله
لناس بقلوبنا تتسلى
وشيطان ما صدق
إنه يتولى
يحكم طبعه ع الغلبان

والكذب في ذمته أولى
جريء بالذل والنسيان
نسيان الحق في بلادى
ومهما يجور
دا شيء عادى
فتسكت صرختك جواك
وتتعذب كثير برضاك
يموت الحق ونسلم
لظنون اليأس تتعلم
تدورع اللى فاضلك

خلاص الخوف بقى ضلك
يعيش العمر ويدلك
وتبكي من الهموم أيام
وترجع جوه زنزانه
ماخلاص الحق غمض نام
ومات الصدق جوانا
غريبه ياضحكة المظلوم
رضيتي بجرح كله غيوم
مرار الكاس ماينداقشى
عذابه نار ماتنطاقشى

ولما النفس تتوجع
تقول حاضر أنا هامشى
واروح بره كيان روحى
فتتصبر بقوة حلم أيامى
والاقتى الصعب من بوحى
يحط الفرحة قدامى
فاعيش من تانى وأقرر
أعود أكبر ما أتصور
إنسان بروح خياليه
عائش ليكم ومش ليّ

غلاسه ع الدنيا

عيش الحياه بغلبها
قول للوجع متقسنيش
ولو المرار زايد بالقوي
قوله انطوى خليني اعيش
فكر وحارب وقتها
خلي الألام تصبح مفيش
إذا الجراح كترت عليك
ومالقتش حد يحس بيك
إضحك لنفسك بالقوى
واغمز لها ... مايمنيش
أيوه كده على إيه بقى

نحسبها

ونتوه ونرضى بغلبها

هي الحياه إيه عندها

صبرك علينا يا دنيا إيه

شغاله طحن فينا ليه

هو انت إيه مبتزه قيش

كل الرضا في لحظه صفا

واللمه في حزن ودفا

نسى الكلام وأوام ننام

من بعد حزن وهم طال

وكان محاوط كل شئ

دلوقتي تؤ..تؤ..تؤ

ميهز نيش

الإلهام

نزل الإلهام أوام جالى
وراح النوم وانا مالى
لو أنت رخيص أنا الغالى
فى عزك فرحى يحلالى
أغير حالة الأيام
وأضبط حالة الأوزان

والاقي الحرف يصفالى
يبعت لى الكلام غالى
شاعر طبعا ودا حالى
جمال المعنى على بالى
ومتأصل وكله تمام
ده أجمل وصف للأهلام

حظى

نفس الوجع نفس المصير
بس الألم زايد كثير
بالله عليكِ يادنيا تنسى
وخلى قلبى يعيش في خير
حاضر معاكِ
طول السنه
صايم أنا
عن كل كلمه معلّمه
جوه الدروب
مليانه كذب معتمّه

ونار وغل
داير في كل الأزمنه
قادر أكون
قد السكات
واداوي جرحي
م اللي فات
بتصحّي ليه الذكريات
ولا خلاص مكتوب عليّ
اقع من أول سلمه

نفسنه

ياريت نبطلّ نفسنه
وكمان بلاش طبع الأنا
هناخذ إيه من الحياه
غير الوجع
وهموم كثير بتهدّنا
ليه اللي يعمل خير هنا
يلقى قصاده ألف جرح
ليه الألم لما يصيب القلب
مايدخلش مكانه أى فرح
ليه كل واحد منا

عایش لنفسه قال
وآخر سلطنه
ده مفیش حياه من غير أحبه
وهناخذ إيه من الحياه
غير المحبه
أيوه الأسيه دى
كلمه صعبه
بتمنى نبقى أحلى صحبه
نعقل ونفهم كلنا
يمكن نبطل نفسنه

فرح نفسك

فِطْرَتْ بدمعه من عيني
حزين والهـم ماليني
فعادي يادنيا تنسيني
وعمرى ما قولت يا خساره
على دموع ملت عيني
وهاستغفر لزلالتي
واعيد من تانى حساباتي
واركز وابدأ الآتى
مفيش أحلام هتتأجل
ده جزء مهم فى حياتي

وهارسم بکره بعیونی
واکحل رمش کلماتی
بنور الحب ف حیاتی
وکسرة قلبی من جوه
هاغنیها حاجات حلوه
وتعزف لی نغم وحنین
تفرحنی واعیش لی یومین
ویغیب الدمع عن عینی
ویحلا عمری و سنینی

عناد الدنيا

لو صوت ضميرك راح
ممكن تناديله
موجوع و كلى جراح
والهم طال ليله
شايلى فى قلبى وساكت
وبقوله هاقدر اعيش
وسنين العمر فاتت
والفرح ليه ما يجيش
مالك يادنيا إيه
ليه تحيري فينا

جايه علينا ليه
حزنك مكفيننا
وهتفيدنا بايه
لما تعاندنا
هو المرار والههم عنوان
في أشعارك
دايما في عز الفرح
الدمع يختارك
موجود معاك ليه
بجرح أيامي

بتبني دايا ليه
ميت حيطه قدامي
يامبيتانا في نار
وانت ولا حاسه
والله أكبر..
عار إن القلوب تقسى
وان كان ضميرك قل
احكى له ع القصه
لما الميزان يختل
لما البشر تنذل

لما الى باع الصدق
يظلم ويتوصى
ساعتها راح تفهم
إن البشر درجات
في ناس تموت م المهم
وناس ولا بتلم
وناس تعيش وتموت
ولاجاتلهاش فرصه
لو صوت ضميرك راح
ممکن تناديله

وصية شهيد

أنا مُت عشان بلادى
و كنت عليها بنادى
خليك يا مصر دايم
قد كيد الأعداى
يا أمى اسمعيني
الى بينك وبينى
عمرى وروحى ودمى
ومش هاضحى بدينى

أنا مت عشان بلادی
و كنت علیها بنادی
یا أمی متزعلیش
ویاریت متعیطیش
حبك دایما فی قلبی
واتماسکی ماتتهزیش
انامت عشان بلادی
و كنت علیها بنادی

قلب مصرى

يارب مين يحمينى
بحب بلدى ودينى
خايف اضيع فى سنينى
ويارب مين يهدينى
بلد الشهيد
بلد الوليد
بلد اللى راح وراحل
واللى جاى من بعيد
راحت لياليها
ضاعت معانيها

ليه تكسروا فرحتها

ليه تجبسوا دمعتها

ليه تفرقوا امتها

ليه تقتلوا

ليه تسرقوا

ليه تخربوا

أنا عشت عارفه إنها

ربي حافظها لشعبها

يارب أنا إستودعتها

عندك وإنت الحفيظ

الدم ليه .. الغدر ليه

يوم لقاه هتقولوا إيه

ها تقولوا أنا ضيعتها
وسبيت كل يوم شهيد
بدماء يطهر أرضها
يوم الحساب قرب
وازاي راح تهرب
اسعى لربك واطلب منه
يمكن تلقى ليك المخرج
قرب ليه واستغفره
في بلدك فكر
صحّي ضميرك واعدله
يامصر ربنا هيصونك
شعبك عمره ما يخونك
يارب مين يحميني
باحب بلدي وديني

شکوی وطن

بلجأ إليك ياربي
من ظلم الحياه
ببكي وجوه قلبي
يجي ١٠٠ ألف آه
قلبي حزين
وانا يعنى إيه
هاشكى لمين
ده تراها غالى
وشعبها ناس طبيين

بلدى اللى كانت
حته منى فى الميدان
تاهت وراحت غصب عنى
فين الأمان
مش هيه دى اللى فى يوم
أنا عشانها قمت أضحي
أرضى اللى كانت حته منى
وبرضه أنا حته منها
الغدر ليه مالى الشوارع
ليل نهار
ليه العدو فى لحظه
يبقى له القرار

فين اللى ماتوا فى يوم
عشان يحموكِ إنتِ
نسيتى ليه دم الولاد
يامدينتى
الحب راح ويا الجراح
وقلوبنا فى
بشكى إلك ياربى
وانت المعين
تنصرلى وطنى
وتحفظه م الغدارين

توهة إنسان

أنا إنسان بلا عنوان
عاشق خايف ورا القضبان
حبيب تايه لكن سجان
حياته رهنها للأحزان
وأشعاره بلا أوزان
وداب ف الحب من نظرة
عجيب الطينة والبذرة
وأوجاعه بحور جافة
وعاش كداب عشان زفة

مسيرها ف ساعة
راح تنفض
ويتذلل لطوب الأرض
ويبكي بحرقة ويعاند
ويقول اللهم مش قاعد
أنا مجروح لكن جامد
واناهتمسك
بحلم العمر واتعكز
وبعد ما كنت يوم تلميذ

أكيد ها اكبر وهتأستد
واعلم ع الحياة بدروس
واعدي فوق جروحي وادوس
ومش هارضى أكون محبوس
وخوف اليأس يكسرني
ف روجي تغيب وتحضرني
وتهدي م الحنين وردة
وأفكاري اللي كات شاردة
برغم الشوق تيجى بادره

تقولي الفجر طال ليله
ومسير الشمس هتجيله
وتديله م الدفا فدان
وتعزف م الفرحة ألحان
وتتبدل كده وترجع
ليالي زمان
ساعتها بس راح تعرف
مفيش إنسان...
بلا عنوان

ضمة حروف

الاسم أصحاب

قلم وكتاب

ماينهم ألف قصة حب

وقلم عاصي ضل وتاب

تغير الدنيا من حرفه

حزين الشكل مين عرفه

ومسكونه ياأحلي معاني

ف قلوبنا

ماين الفتحة والكسرة

أکید دوبنا
تشد الحرف ع الآخر
نضم الجرح يتأخر
وتتبدل أكید روحنا
فنبني السطر ونعافر
وسن قلمنا یجر حنا
عجیبة یاصفحة الأيام
عماله تمر جحی فینا
یامرسومة علی الأوهام
بلاش للماضي ترمینا

وتملي الخبر من دمعي
وأقول حاضر ولا اتكلم
وهيهمك فإيه وجعي
ولسه الغدر أهو معلم
غاويه ليه تعاندينا
وانت كتاب مالوش أحباب
ما تحيِّينا عنا وانسينا
بلاش قلمي يكون كداب

مبادئنا

نسینا فی زحمه الدنيا
مبادئنا وأخلاقنا
لعالم خاییه وغبیه
زرعنا الكذب بالنیه
وسینا الهم یدبحنا
بنغلط آیوه من ضیقنا
فتتکلم کلام فاضی
لا تفهم منه ولا حاجه
بقت غلطاتنا شیء عادی

كلام مليون كده سذاجه
ومين قالك يا شيخ إوعظ
ماتبعد عننا شويه
وجدد نسخة الويندز
وضيع في صحبه وهميه
هتلقى الحق وجدیده
تلاقي قولنا بنعيده
لكن بطريقه عكسيه

السيرة الذاتية

- الاسم: نور الجنة درويش
- معلمة وصحفية وشاعرة ومنشدة.
- تعمل في الصحافة كمحررة في عدة صحف ورقية وإلكترونية منذ ٢٠٠٨ م وحتى الآن.
- تعمل كمعدة في عدة قنوات تليفزيونية .
- تعمل كمعلمة لمحو الأمية وتعليم الكبار.
- عضو عامل برابطة الزجالين وكتاب الأغاني.
- عضو عامل بجمعية الأدب والفكر المعاصر.
- عضو عامل بالنقابة العامة للتعليم والبحث العلمي.
- شاركت في مئات الندوات والمؤتمرات الثقافية والأدبية.

- أسست مع نخبة من الأدباء فريق أدبي وثقافي وفني تحت اسم : شبابك.
- نالت عشرات الدروع والقلادات وشهادات التقدير.

الفهرس

٥	أحبك ربي
٨	نور
١٣	إبرة حلم
١٥	آخر قرف
١٩	اسمع معاليك
٢٣	الشاعر ع المنصه
٢٦	بيني وبينه
٣٣	أمى
٣٥	رسائل القلب
٣٧	بلد السلام
٤٠	أحمد
٤٣	هشاشه روح
٤٦	طبع البشر
٤٨	أقصر الشر
٥٠	حالة مرض
٥٣	القبله
٥٧	بنك الفقر

- ٦٠..... وصف الشاعر.....
٦٤..... كدبه.....
٦٨..... غلاسه ع الدنيا.....
٧٠..... الإلهام.....
٧٢..... حظى.....
٧٤..... نفسه.....
٧٦..... فرح نفسك.....
٧٨..... عناد الدنيا.....
٨٢..... وصية شهيد.....
٨٤..... قلب مصرى.....
٨٧..... شكوى وطن.....
٩٠..... توهة إنسان.....
٩٤..... ضمة حروف.....
٩٧..... مبادئنا.....
٩٩..... السيره الذاتية.....